

## Yn Doolane

Ny hoie roish yn aile as yn chenn chlag grigyracht magh ny minnidyn. Çheu mooie ta'n fliaghey tuitym dy trome, jeealley noi gless yn uinnag.

Lhisagh eh goll roish. Ta ny smarageyn cur magh çhiass rea as ta clea-drommey yn chaair as lhiushag croghey veih, freayll rick er ny sheidagyn. Ceau shilley magh er yn uinnag, t'eh fakin ny bodjallyn. T'ad er ny sheidey harrish lheeahys y speyr. Tra v'eh aeg boallagh eh sheiltyn keeall er nyn gummaghyn. Gailleypenn, fainnagh, caillagh, dragane. Cre ta'n bun jeue jiu?

Bing as y chlag nish, kerroo yn oor. Ta'n fliaghey trome sheeane y gollrish doarnane yn shillee tilgit noi y thie. Ta ny bootsyn echey ny hassoo ry-cheilley ec y dorrys as e cooat jeen noi ushtey croghey er treiney. Nagh ragh eh?

Ram kearytyn bleeanyn er dy henney v'eh er droaghyr cour giattyn ny sleityn as eh jeh'n çeshaght chaggee. Skeeys as accrys er, gyn fys ass cre veagh yn nah ghreain cheet nyn oi. Va laagh gyn towse as rio dewil ayn. Ta ny cooinaghtyn cho baghtal myr dy row eh jea. Traaghyn doccaragh as gaueagh. Agh nish ta cooinaght er, er caarjys as obbyr co-yantagh, startaghyn warree as skeeayllyn contoartyssagh fo re-hollys roish çheinjean y champ.

T'eh gennaghtyn y çhiass shen agh t'eh loaghtyn y chair fo neesht. Ta "lhisin irree seose" boayll ennagh sy chione echey agh ta thort jeh meir riojit as fliughey as jeh obbyr creoi myrgeddyn. (Nagh vel shen dy liooar colb y vrishey?) Veagh laagh ayn gyn dooyt, festey rish bootsyn, cur feayraght agglagh er cassyn. Cha beagh caa shaghney eh. Kys foddagh oo jannoo shen?

Ta'n aile cur eieyn jeh sourey er. Ta'n çhiass cur thollaneys er. S'taittin ceau laghyn fo grian er y clieau lesh rearytyn foddey jeh, veg dy ve ry-chlashtyn agh cronane ny shellanyn as shirragh y ree ny hassoo er yn aer. Er y traie veagh oo dty hoie er ny claghyn cur brasnagyn mooirchoorey fo ny coirrey veg, jannoo y ushtey cloie as feoghaigyn ayn. Oirr y chruinney as shiaull sy yoin. Veagh yn traie dy kinjagh coir tashtee lane dy claghyn, meein as garroo, doo as bane, leacagh as runt. Shlugganyn, neesht, maidjyn roosht baney liorish y cheayn as glass-marrey yldeahit. Veagh sheean yn ushtey roie trooid ammyr creggagh ayn, ny drommagyn beggey cloie jeant meein liorish ushtey jeh ymmoddey bleeanyn. Va traa dy liooar sy aegid echey ry-hoi jeeaghyn er ny king tramman ny brick ry-akin dy baghtal agh follit foast ayns ushtey sullyr y trooan, fo ny biljyn.

Ta criu jannoo er, sy lurgey echey as seiyghyn beggey piandagh ayns e h-olt lheshey nish. T'eh scughey sy chair. S'cowrey emshir fliugh eh as eh, rish-hene. "Grig, grig, grig" ta'n chlag fockley magh dy rea. Eisht "bing" er ard myr sarjant. Ta gardar feddan mygeayrt y thie as tilgey bulladyn fliaghey noi ny uinnagyn. Nish ta'n shallid-cheim er. Irree seose, ghooiney, as eh. T'eh shassoo. Drid beg as jaggad mysh. Ta scansh echey lesh crammanyn fo e smeggyl. T'eh lhoobey yn ghlioon echey, crommey cour ny jeealyn as kiangley ad dy chionn ec ny keylidyn-coshee. Ceau blakey marroo er y chroghane, t'eh chyndaa mygeayrt dy akin y bayrn gorrym echey er y chubbyrt sniessey da'n dorrys dooney. Ta sheidagyn geyrey cosney stiagh trooid baarney yn uinnag cur sarey da e h-edd y kiangley lesh strengyn fo smeggyl.

Ta'n derrey laue echey er y snig as yn er elley jeue lesh bass foshlit er coolley y dorrys jannoo aarloo. Dy siyragh t'eh foshley as dooney y dorrys as eshyn er y cheu-mooie. Ta ny lurgaghyn echey çheet dy ve fliugh ayns grig agh t'eh shooyll lesh yoin mygeayrt corneil y thie, fo yn tramman, shaghney eekid

foaid noi y woalley. T'eh croymmey chouds ta'n gheay screeaghey, cour bwaane coon er oaie y thie veg. Ta crouwyn aittin brisht baiht sheebey mygeayrt ny cassyn echey. T'eh tayrn magh yn choyr vooar queeylagh as gleckey lhee lesh y raaid.

Dar y lioar, er-lesh. S'mooar yn feoh aym er laa yn charbyd-orçh.